



**PARTURENA PARPUNGUAN BODARI
DI PARNINGOTAN ARI HATUTUBU
NI TUHAN JESUS
(Natal Umum)**

📖 Ev: Mateus 1 : 18 - 25

📖 Ep: Jesaya 11 : 1 - 5

**TOPIK :
IMMANUEL : DONGANTA MA DEBATA**



**HURIA KRISTEN BATAK PROTESTAN
RABU, 24 DESEMBER 2025**

I. SIPATUDU:

1. Di parpunguan Natal bodari on, disagihon ma angka Liturgi sipajojoron ni na mewakili ganup naung rade di acara on.
2. Hombar tu torop ni na hinaporluhon ni ganup huria, na boi do dibuat muse ayat na hombar tu liturgi na rade di acara on.
3. Diparade jala ditontuhon hian ma angka sipagalak lilin di jolo ni langgatan.
4. Diparade ma lilin na metmet (Handle Light) dibagihon tu sude ruas, sipagalakon uju mangendehon **Buku Ende HKBP No. 54.**

II. PAMUHAI NI PARPUNGUAN LAHO PAGALAK LILIN:

U: Sadari on tapatupa do Parpunguan Bodari Parningotan Ari Hatutubu ni Tuhan Jesus. Marpungu do sude angka na porsea manghamauliatehon balga ni asi ni roha ni Debata na manongos AnakNa na sasada i gabe haluaon sandok manisiasia.

H: **I ma hasisingkop ni bagabaga ni Debata na hujalo hami, ai nunga hubege jala hutanda hami sandiri, Ibana do tutu Sipalua portibi on.**

U: Nunga tubu Raja ni Hadameon nunga tutu ro Ibana. Nunga di tongatonganta Ibana. Ala ni i naeng ma dohononta:

H: **Immanuel : Donganta ma Debata.**

U: Nunga patar asi ni roha ni Debata di tongatonga ni HuriaNa, nunga patar pambahenan ni Debata di portibi on. Antong tanda naung di tongatonganta Panondang i, hujou hami ma hamu tu jolo angka sipagalak lilin on; *(ro ma tu jolo angka naung ditontuhon)*.....Dipagalak ma lilin naung diparade di Langgatan.

(Dung sidung pagalakhon lilin mulak ma tu ingananna be)

U: Antong tapahibul ma rohanta manjangkon Ibana tubu di rohanta nang di parsoran di hurianta borgin on. Taparade ma rohanta marsomba tu Debata!

1. MARENDE BE. HKBP No. BE. 616 : 1 - 3 “Ulina I Di Borngin Na Badia”

♪♪ Uli na i di borngin na badia humirdophirdop do bintang disi
Di borngin i do tubu Sipalua di panggagatan di Betlehem i
Portibi on dangol gok haholomon marnida sondang ni Tuhantai
Uli na i marende do suruan di borngin i do tubu Kristus i
Di borngin i do tubu Kristus i

♪♪ Sian na dao parroha sian Purba ro do tinogihon ni bintang i
Marsinggang be nasida lao marsomba tu Jesus Kristus Sipalua i
Ibana ro sian banua ginjang lao paluahon hita jolma i
Uli na i marende do suruan di borngin i do tubu Kristus i
Di borngin i do tubu Kristus i

----Musik----- (*Jongjong*)

♪♪ Uli na i sude marlas nia roha ala naung songgop harajaonNa i
Huria i ria do ro marsomba mamuji Raja na sun sangap i
Ibana do panondang hangoluan na mangalehon panghirimon i
Uli na i marende do suruan di borngin i do tubu Kristus i
Di borngin i do tubu Kristus i

2. VOTUM – INTROITUS – TANGIANG :

U: Marhitehite Goar ni Debata Ama, dohot Goar ni AnakNa Tuhan Jesus Kristus, dohot Goar ni Tondi Parbadia na tumompa langit dohot tano on. **Amen.**

Manetehi ma angka langit sian ginjang, jala diusehon angka ombun ma udan hatigoran. Buha ma tano on jala diparbuehon hatuaon dohot hatigoran. Angka langit do mamaritahon hamuliaon ni Debata, jala jadijadian ni tanganNa do pinaboa ni na ratarata ni langit i. Haleluya!

H: (Mangendehon): ♪♪ Haleluya... Haleluya... Haleluya.

U: **Martangiang ma hita!** Ale Amanami na di banua ginjang! Na mandok mauiate do hami tu Ho, ala dipabotohon Ho tu hami marhitehite AnakMu Tuhan Jesus Kristus, na laho salpu sogot langit dohot tano, alai na hot do anggo HataM ro di salelenglelengna. Angkup ni i, ingkon patar do sogot saluhut jolma di jolo ni habangsa paruhumanMi. Sai asi

ma rohaM di hami, pahot ma rohanami marhaporseaon di HataM marhitehite Tondi Parbadia. Padungo ma hami jala paringgas hami martangiang, asa marlas ni roha hami paimaimahon Ho, jala asa dapot hami hangoluan na so ra suda. Amen.

(Hundul)

3. MARENDE BE. HKBP No. 58 : 1 – 2 “Martumbur Tungkotungko”

♫♫♫ Martumbur tungkotungko na di si Jese i
Na tubu Posoposo na pinarbaga i
I ma Tuhanta i sinuru ni AmaNa tu hita jolma i

♫♫♫ Tumbur sinurirangkon ni si Jesayas i
I do na tinubuhon ni si Maria i
Na saut ma jumpa i na pinarbagabaga ni Debatanta i

4. P A T I K :

U : Tangihon hamu (Tatangihon) ma Patik ni Debata, i ma **1 Johannes 5 : 1 – 2**. “Ganup na porsea, Jesus do Kristus, i do naung tubu sian Debata, jala ganup na manghaholongi Ibana na manubuhon, haholongan ni i do nang na tubu sian Ibana. Sian on do taboto, naung holong rohanta di angka anak ni Debata: Molo tahaholongi Debata jala taradoti PatikNa.

I do sahatna. Antong rap mangido gogo ma hita tu Tuhan Debata!

U+H : Ale Tuhan Debata, sai pargogoi ma hami mangulahon na hombar tu PatikMi. Amin

5. MARENDE BE. HKBP No. 182 : 1 - 2 “Tu Jolom O Debatanku-1”

♫♫♫ Tu joloM o Debatanku sai use do rohangkon
Sai pasiat tangianghu dohot iluilungkon

....Jongjong...

♫♫♫ Husolsoli do rohangku na gok dosa i tongtong
Ai godang ariaringku na hubahen ambolong

6. TANGIANG MANOPOTI DOSA:

U : Tatopoti ma dosanta, martangiang ma hita: Ale Debatanami, na marasiroha jala na badia, Amanami, marhitehite Tuhan Jesus Kristus!

Manang piga hali hami ro tu joloM, huhilala hami, ringkot do asi ni rohaM di saluhut hami halak pardosa. Ala ni i do umbahen na hupaserep hami dirinami sadari on di joloM, jala huparhatopot hami, tung na jotjot do hami manimbil sian angka dalanMu na badia songon birubiru na lilu. Sai unang pabali hami sian joloM ala ni dosanami i, ai ndang dihalomohon rohaM hamatean ni angka pardosa, alai hamubaon ni rohana do lomo ni rohaM, asa mangolu. Sesa ma saluhut hageduhonnami dohot pangalaosionnami marhitehite Pangulunami na sasada i, AnakMu Tuhan Jesus Kristus. Sai pahot ma asi ni rohaM di hami marhitehite panindangion dohot hagogoon ni Tondi Parbadia asa tarapul situtu rohanami manjou Ho, asa pantun, tigor jala daulat hami marpangalaho, bahen hasangapon di GoarMu na badia i. Amen.

Bagabaga ni Debata taringot tu hasesaan ni dosa:

Humophop hita, gabe dosa do Ibana na so tumanda dosa dibahen Debata, asa gabe hatigoran ni Debata hita, marhitehite Ibana.
Hasangapon ma di Debata na di ginjang !

U + H: Amen

(Hundul)

7. MARENDE BE. HKBP No. 46 : 2 + 10 “Na Sian Ginjang Do Au Ro”

♪♪♪ Naung tubu do saborngin on Anak ni na marbaju on
 Anak na uli situtu na gabe las ni rohamu
 ♪♪♪ O Jesus haholonganhi bongoti dohot rohangki
 Pabali sian i sude na tau mangango au muse

8. E P I S T E L:

U: Tangihon hamu (Tatangihon) ma hata ni Debata Turpuk Epistel di Parpunguan Bodari Parningotan Ari Hatutubu ni Tuhan Jesus on, i ma **Jesaya 11 : 1 – 5**. Dung i ruar ma sada tunas sian tungko ni si Isai, jala marparbue sada tubis na tubu sian uratna.

H : Jadi songgop ma tu ibana Tondi ni Jahowa, Tondi ni habisuhon dohot hapistaran, Tondi ni panuturion dohot hagogoon, Tondi ni parbinotoan dohot biar maradophon Jahowa.

U : Jala halomohononna do hadaulaton maradophon Debata, jala ndang manguhum ibana marguru tu parnida ni matana, jala ndang manguhum ibana marguru tu na binege ni pinggolna.

H : Marhitehite hatigoran tahe uhumonna angka na pogos, jala marhitehite hasintongan patingkosonna uhum tu angka na dangol di tano on, jala marhitehite batahi ni pamanganna libasonna tano on, jala marhitehite tondi ni bibirna bunuonna halak parjahat i.

U : Jala hatigoran do hohos ni gontingna, jala habonaron hohos ni akna.
I do sahat na. Martua do angka na tumangihon Hata ni Debata jala na umpeopsa. Amen.

9. MARENDE BE. HKBP No. 56 : 1 + 3 “SAI RO MA HAMUNA”

♪♪♪ Sai ro ma hamuna angka na porsea sai ro ma hamuna tu Betlehem

I da dakdanak Sipalua hita tasomba ma Ibana

Tasomba ma Ibana tasomba ma Ibana Rajanta

♪♪♪ Hamuna suruan puji ma Jahowa rap dohot sude na martua i

Sangap di Tuhan Debata di surgo tasomba ma Ibana

Tasomba ma Ibana tasomba ma Ibana Rajanta

10. MANGHATINDANGHON HAPORSEASON:

U : Tahatindanghon ma haporseaonta i, songon na hinatindanghon ni donganta sahaporseaon di sandok portibi on. Rap ma hita mandok!

H : Ahu Porsea di Debata Jahowa..... d.u. (Hundul)

11. LITURGI :

A. LITURGI I : Lingkungan Barisan Kalang Simbara

Prolog : Debata do mula ni nasa na adong, jala Ibana nampuna saluhutna. Nuaeng begeonta ma songon dia panindangion ni Bibelta taringot tu panompaon dohot pangaramotionNa di nasa na adong:

1. Johannes 1:1- 3 :

2. Johannes 1: 4-5 :

3. 1 Musa 1:1-3 :

4. 1 Musa 1:4-5 :

5. Psalmen. 33: 3-4

6. Psalmen. 33: 6-7

B. Koor:

C. LITURGI II : Lingkungan Huta Dame

Prolog : Alai nang pe songon i uhuman ni Debata, sai tong do didatdati jolma mangulahon dosa; ndang parduli nasida di hasintongan dohot hatigoran ni Debata. Hajahaton tung tangkas masa di ngolu ni angka na marhahamaranggi di hajolmaon. Tabege ma panindangion ni Bibelta :

1. 1 Musa 4:3-5 :
2. 1 Musa 4:8-10 :
3. 1 Musa 4:11-13 :
4. 1 Musa 4:14-16 :
5. Jesaya 59:3-4 :
6. Jesaya 59:7-8 :

D. K O O R

E. LITURGI III : Lingkungan Pardomuan

Prolog : Nandang dipasombu Debata jolma i mago di bagasan dosa, ai ninna do: "Tung tagamon marlomo ni roha ma Ahu mida hamatean ni parjahat i", ninna Tuhan Jahowa; "nda tagonan nian, molo muba rohana i sian dalanna angka na sai laon, asa mangolu ibana." (Hes 18:23). Begeonta ma asi ni roha dohot bagabaga ni Debata tu jolma pardosa i.

1. Yesaya 1 :18-19 :
2. Yesaya 4:2-3 :
3. Yesaya 54:7-8 :
4. Psalm 103:2-4 :
5. Psalm 103:8-10 :
6. Psalm 103:11-14 :
7. Psalm 103:15-18 :
8. Psalm 145:8-10 :

F. LITURGI IV : Lingkungan Bintang Hulu

Prolog: Asi ni roha dohot holong ni Debata tu jolma pardosa dipasahat do marhite bagabagaNa na ingkon sipaimaon jala sihaposan ni jolma pardosa i. Sian na robi nunga dipabotohon hian taringot tu Sipalua jolma pardosa i: "Ai songon on do holong ni roha ni Debata di portibi on, pola do AnakNa na sasada i dilehon,

asa unang mago ganup na porsea di Ibana, asa hangoluan na salelenglelengna di ibana. Ai ndang na disuru Debata AnakNa i tu portibi on, asa uhumanNa; naeng paluaonNa portibi on tahe, umbahen na disuru “(Joh 3 : 16 - 17)

1. Mika 5 :12 :
2. Psalm 118 :24-25 :
3. Jesaya 9:1-6 :
4. Johannes 1:6-7 :
5. Johannes 1:8-9 :
6. Johannes 1:10-13 :

G. K O O R

H. LITURGI V : Parhalado

Prolog : Hasasaut ni bagabaga i, i ma marhite hatutubu ni Tuhan Jesus. Ibana do Debata na ro tu portibi on, Hata i na gabe daging humophop hita jolma pardosa. Ibana do na manaluhon dosa dohot hamatean. Songon on do barita hatutubuNa.

1. Lukas 2:1-4 :
2. Lukas 2:5-7 :
3. Lukas 2:8-9 :
4. Lukas 2:10-12 :
5. Lukas 2:13-14 :
6. Lukas 2:15-17 :
7. Lukas 2:18-20 :
8. Kolosse 1:14-16 :

U: Nunga ro Hatuaonami, nunga tubu Sipalua i. Antong tapuji ma Debata mandok:

H: Hasangapon ma di Debata na di ginjang, dame ma di tano on, di angka jolma halomoan i.

..... (Sude Parhalado pagalak Lilin Tangan ni sude ruas).....

....diiringi soara ni Organ (angonangon) **BE. HKBP No. 54 BL. 64....**

Dung sude lilin galak, taendehon ma **BE. HKBP No. 54 : 1 – 3 BL 64**

“SONANG NI BORNGINNA I“

(Jongjong ma hita)

♪♪♪ *Sonang ni bornginna i uju ro Jesus i; Sonang modom do halak sude
 holan dua na dungo dope; Mangingani Anakna Jesus Tuhanta i.*
 ♪♪♪ *Denggan ni bornginna i uju ro Jesus i; Tu parmahan di Betlehem i
 dipaboa na di surgo i; Nunga ro Sipangolu Jesus Tuhanta i.*
 ♪♪♪ *Godang ni tua disi di na ro Jesus i; Tung malua pardosa muse sian
 hamagoanna sude; Ala ro Sipangolu Jesus Tuhanta i.*

U: Nunga tubu Sipalua i, Raja ni Hadameon. Nunga tutu gabe jolma
 Ibana humophop hita. Nunga singkop bagabaga ni Debata na sian na
 robi i. Tajangkon ma Ibana tu rohanta asa Ibana gabe arta na umarga
 di hita ima haluaon na pinatupana i. Jala momos ma tatiop
 panghirimon na taparhatopot i, ai haposan do na marbagabagahonsa.
 Amen. (Hundul)

12. SUNGGULSUNGGUL

13. MARENDE BE. HKBP No. 49 : 1... “SAI RO MA TU BARA” BL. 47 (Pelea Ia, Ib)

♪♪♪ Sai ro ma tu bara di Betlehem on hamu na porsea hatop ma tuson
 Marnida halalasan ni rohanta i tinongos ni Ama na di surgo i

♪♪♪ O ida hamu ma di bara inon dakdanak na tubu disi borngin on
 Uli do rupaNa mataNa tiur o bereng Ibana ho gabe tiur

-----Musik-----

♪♪♪ Las roha Maria nang Josep disi marnida na metmet na sorang tusi
 Marsomba tu patNa do parmahan i di ginjang marende pardisurgo i

♪♪♪ Pasinggang ma totmu hamuna sude marnida parmahan marsomba muse
 Marende hamu na marlas roha i maniru suruan na di ginjang i

-----Musik-----

♪♪♪ Sai dok ma o Anak ni Debata i Ho ro sian ginjang dibaen asiMi
 Di hami sudena na mardosa on mambaen haluaon di hami tongtong

♪♪♪ Tung aha ulaning denggan di rohaM silehononnnami baen las ni rohaM
Ndang sere ndang perak ndang pinangidoM ai roha na ias sambing do
lomoM

-----Musik-----

♪♪♪ Antong rohanami ma peleanMi o Jesus hasian sai jalo ma i
Ias jala sonang ma baen angka i tongtong gabe domu ma tu rohaMi

14. J A M I T A: Mateus 1 : 18 - 25

15. MARENDE BE. HKBP No. 608 : 1... "O BETLEHEM NA METMET I" BL. 608 (*Pelean II*)

♪♪♪ O Betlehem na metmet i boasa modom ho
Humirdophirdop bintang i hohom marnida ho
Alai ro sian ho do panondang na tongtong
Na pinarsinta na sai laon sorang di borngin on

♪♪♪ Na sorang do di borngin on Kristus Tuhanta i
I do na pinaboa ni bintang na tiur i
Parangan pardisurgo mamaritahon i
Sangap di Debatanta i dame di tano on

-----Musik-----

♪♪♪ Hohom so pamotoan do saut bagabaga i
Sian banua ginjang ro KristusTuhanta i
Portibi on ramun do binaen ni dosa i
Tu angka na manjangkon do ro Sipalua i

♪♪♪ O Anak na badia i ro Ho tu hami be
Bongoti daging tondi i parbadiai sude
Barita na umuli hutangi hami be
Sorang ma Ho dingolungki Ale Immanuel

16. TANGIANG PELEAN: (*Jongjong*)

U : Tatangianghon ma peleanta. Ale Debata, Amanami na di banua ginjang. Ho do haroroan ni saluhut silehonlehon na denggan dohot nasa ulibasa na mauiutus. Hupasahat hami ma sian na nilehonMi tu hami, peleannami tu Ho. Sai jalo ma i gabe uap na hushus di joloM. Pasupasu ma i jala ramoti asa huparhaseang hami pelean on, patimbulhon harajaonMu di tongatonga ni HuriaM dohot di portibi on. Buhai ma rohanami marhitehite TondiM, asa lam hutanda hami godang ni silehonlehonMi tu hami, asa lam girgir hami mandok mauiate tu Ho, marhitehite Jesus Kristus Tuhannami. Amen. **Rap mandok ma hita di tangiang ”Ale amanami....”**

U+ H: Ale Amanami na di banua ginjang....d.u.

U: Tangiang Pasupasu

H: Mangendehon : *♪♪♪ Amen... Amen... Amen...]*